

E ENJTE DATA 13 PRILL 2023

Ndoqa çdo diskutant, që nga mëngjesi, kur ka filluar kjo seancë e deri më tani. Prita që diskutantët e maxhorancës të kishin një qëndrim në lidhje me një ngjarje makabër, me një akt të terrorizmit politik, të ushtruar ndaj drejtuesit të opozitës në bashkinë e Vaut të Dejës. Këtu, në këtë parlament, hartime bëhen pa fund, teori boshe tirren gjithnjë pa fund, por ajo ngjarje është diçka e rëndë, zonja kryetare, që më së paku është dënuar nga çdo qytetar, nga çdo njeri normal. Aq më tepër, zonjë, ne që jemi politikanë e kemi detyrë, pasi me mandatin tonë kemi marrë përsipër të përfaqësojmë qytetarët. Ndërsa ju, që jeni në pushtet dhe e keni për detyrë të mbronit jetën, pronën dhe liritë e çdo qytetari shqiptar, duhej të kishit reaguar. Reagoi Elisa, duke vënë gishtin te Sali Berisha dhe Ilir Meta. A ka gjë më të neveritshme se kjo: që situata e shkaktuar ishte faji i Sali Berishës dhe i Ilir Metës? Askush nga kjo maxhorancë nuk belbëzoi as edhe një fjalë për të dënuar këtë akt terrorizmi politik. Familja e Bernard Ndreca, zonjë, se ti vjen nga ajo zonë komshije me të, është një familje e nderuar në atë vend, është një familje që brez pas brezi nuk ka pasur kurrë as hasmëri, as problematika. Gjon Ndreca ka rritur 3 djem dhe një vajzë, fëmijë të mrekullueshëm, të cilët nuk i kanë hyrë në hak askujt në historinë e tyre jetësore.

Ata kanë vetëm një faj: kanë përfaqësuar dhe përfaqësojnë Partinë Demokratike dhe opozitën e këtij vendi sot. Për këtë faj, duke qenë se kolegu ynë, Zef Hila, dorëzoi mandatin për të shkuar për t'u shërbyer banorëve të Vaut të Dejës dhe Bernard Ndreca, si kryetar i Partisë Demokratike atje dhe i opozitës, mori përsipër të drejtojë fushatën e kolegut tonë, ai duhet likuiduar politikisht. Ky ishte vendimi që u mor, një vendim politik. Ta harroni ju se mund të kalojnë situata dhe ngjarje të tilla duke mbyllur gojën, duke bërë memecin. Po jua përsëris: as Benard Ndreca dhe as familja e tij nuk kanë pasur problematikë me ligjin apo me shoqërinë. I gjithë ky atentat politik i është bërë vetëm për arsye politike. Çfarë tregon kjo? Kjo tregon qasjen tuaj, qasjen e kësaj mazhorance, qasjen e këtij regjimi ndaj opozitës. Pse? A mund të shpjegohet ndryshe që Kryeministri, pa u bërë disa orë nga ngjarja, ishte në aktivitet dhe nuk e përmendi fare?! Askush nga ju sot nuk e përmendi fare, a thua se atje ishte goditur një mizë, jo lideri i opozitës i një prej bashkive të këtij vendi, dhe jo një njeri, një familjar i shkëlqyer, pa asnjë problematikë me ligjin. Bëtë gjithçka kundër opozitës; bëtë gjithçka për ta përçarë; bëtë gjithçka për ta likuiduar politikisht, tani, ngaqë nuk ia dolët, po tentoni të bëni edhe likuidime fizike. Vini këtu e fusni kokën në ato tavolina si "struci në rërë", dhe nuk keni kurajë, kur edhe një kriminel, kushdo qoftë në këtë vend, po t'i ndodhin ngjarje të tilla, duhet reagim, duhet dënim. Pse?! Sepse edhe për kriminelin nuk është tritoli një zgjidhje e shtetit demokratik, nuk është likuidimi, por është ligji, drejtësia, jo më për liderin politik të një zone. Çfarë tregoni me këtë?! Që mbrapa atij atentati politik jeni ju, është Edi Rama. Prandaj nuk bëzani asnjë fjalë për ta dënuar. Pa lejen e Edi Ramës dhe të ministrit të familjes, nuk ka asnjë delikuent në këtë Shqipëri që guxon të shkojë të ndërmarrë një akt terrorizmi politik ndaj një drejtuesi politik. Këtë ta harroni! Pse? Sepse ju e shihni veten të pashpresë. Askush nuk ju pret, askush nuk ju takon. Ndaluar edhe takimet me idenë e kursimeve, sepse Edi Rama takohet vetëm nga administrata; nuk ka qytetar që del t'ju takojë, t'ju mirëpresë dhe t'ju mbështesë, as ju dhe as administratën. Prandaj e bëtë këtë, sepse për shpenzime e bëri Edi Rama takimin, prezantimin e kandidatëve aty në shesh. Pastaj futi një milion euro festën, duke u harbuar gjithë natën. Harroi që disa nga qejflinjët brenda asaj feste, të pirë dhe nën avujt e alkoolit, ia nxorën, e bënë publike atë festë për shqiptarët. Sa?! Pesë orë pasi tha: "Ne nuk do të

shpenzojmë". Po, po, nuk do të shpenzoni ju, sepse strategjia juaj është terror dhe blerje. Çfarë keni bërë? Pse nuk ka folur asnjëri? Ku është zotëria këtu?

Zonja Kryetare e Kuvendit, duhej të kishit folur, të paktën të kishit dhënë një mesazh që dënohet akti terrorist, pra të dënohet ky veprim. Mendoni sikur ai tritol t'i ishte vënë ndonjërit prej jush, çfarë do të thoshit? Do të drejtonit gishtin direkt, ndërsa këtu fërkoni duart. A ka fytyrë njerëzore kjo qeveri, moj zonjë? A mund ta quajë kush më këtë qeveri? Ju jeni regjim, por tani keni kaluar çdo limit. Përgjigjen do ta merrni më 14 maj në Vaun e Dejës dhe në të gjithë Shqipërinë. Nuk ka presion, shantazh, para apo tritol që do ta ndalojë vrullin e demokratëve, të opozitarëve të këtij vendi për t'ua treguar vendin të parit Edi Ramës, por edhe ju të gjithëve, se vetëm mazhorancë nuk jeni; jeni një grup i strukturuar kriminal dhe asgjë më tepër. Faleminderit!